




Nabi Nuhan a Fe

Taruxuni ito kelixi
Alaa Kitabun nan kui
Dunuja Fɔlɔna
Sora 6 han Sora 9



N Benba Adama dangu xanbini, muxun birin
bata findi muxu kobin na Ala yεε ra yi.

Birin bata fe kobin liga.


Koni, muxu tinxinxin nan yi Nuhan na
Ala yεε ra yi. A yi xuruxi Ala ma.

Dii xεmε saxan Nuhan yii. E yi xili nεn Semi,
e nun Xami, e nun Yepeti.



Ala yi a fala Nuhan xa, a naxa, “Kunki belebelen nafala.” Nuhan yi a yabi, a naxa, “Awa, n na a rafalama nen.”

Nuhan yi Alaa falan suxu. A yi kunkin nafala alo Ala a yamarixi kii naxan yi.



Kunkin to yelin, sube wuyaxi yi so kunkin kui,
firin firin yeen ma. Sube xemen nun a gilena
nan yi soma – xoline firin firin yeen ma,
barene firin firin yeen ma, e nun sagine e nun
jingene. Ndee yi so soloferen soloferen.
Suben sifan birin yi so na kiini fo naxanye
ige xore ra.

Na xanbi ra, Nuhan fan nun a denbayaan
yi so kunkin kui.




Na xanbi ra, tulen yi fa fɔɔ. Tule gbeen yi fa han! Na xanbi ra, a gbegbe mɔn yi fa.

E nun, igen naxan bɔxɔn bun, na fan yi te fɔɔ. Tulen yi fa bɔxɔn ma soge tonge naanin, kɔɛ tonge naanin.


Tule igen yi te han a yi findi fufaan na.

Igen yi sa seen birin xun ma, hali wudine birin e nun geyaan birin. Banxine birin yi kala igeni. Koni kunkin yi lu igen fari.




Nayi, muxune birin yi faxa igeni.
Ala yi e birin halagi bayo e yi jaxu.

Koni Nuhan nun a denbayana e nun subena
ndee yi kunkin kui. Ala yi Nuhan natanga
bayo tinxin muxun nan yi a tan na.



Nuhan yi lu kunkin kui xii wuyaxi. Loxona
nde, Nuhan yi a to igen birin bata magodo.
Nuhan yo, a denbayaan yo, subene yo,
e birin yi mini kunkin kui.

Nuhan yi a fala Ala xa, a naxa, “Tantunna
Ala xa.” Nuhan yi saraxan ba Ala xa
a tantun feen na.



Ala yi sengunna sa kuye ma.

Ala naxa, “Sengunni ito findixi n ma tulisa taxamasenna nan na. N mi fa dunuja halagima igen na sɔnɔn.”

Han iki, en na sengunna to kuye, na Alaa tuli saan nabirama nen en ma, fa fala, Ala mi dunuja halagima igen na sɔnɔn.

© Mission Protestante MCA
2022/2023

Images par:
©Global Recordings (GRN)
©Bible Visuals International (BVI)
Avec permission

Taruxuna kelixi
Kisin Kiraan Kitabuna
©Traducteurs Pionniers de la Bible
2012